

Mwthangjakna Lama

Khajani kiching,

Obo wng kha langma-o kwtal khe slaijaknani bagwi nangsugwi tongmani kothoma kaham, abo nono khoroksabo sa ya phano wngwi man kho. Eba khe abo nini uansukmungo phano se phai ya wngwi man kho. Oboni bagwi nwng kisisa jora rwui da mano? “Ang sabo? buroni phai kha? O swngcharo ani naharmungba tamo? O swngcharo ang tamo khlai tong? Tumung ang tabukno thwi khe biyango thágnai?” hwnwi nwng uaisa phano sak sak uansugwi da nai kha?

Borokni bwkha-o bukcha, khá kochom ya wngma tei khá khammarok tamoni bagwi wngna?

Kubui kók khe, rang, samung, jolma-jolsa eba naithokmung abórok bororokno sói tongthokma, khakchangma tei lenglama rwi man ya. Nini uansukma-o borokni thani bubo kubui tei jotoni slái nangkukmani hwnwi tong? Borok tamo wngwi bini khá-o bukcha wngma, khá kochom ya wngmarokno supungwi man yana tei juda-juda lama naituguibo tamo wngwi khá khammarokno ham rwui man ya wng? Borok tongthokma mannani bagwi chaitokna tháng thani kwbangma lama tei tongmungo sakno bedogwi kháno kochom rwnani nai-o, phiya abo ulo bini bwsak tei pholano se sokomorwi khibi-o.

Chwrai bwsa bumano naitugwi kabwi tong phuru thwngjaknai phutla phano bono ham rwui man ya. Abo hai kheno twi kwrwini bagwi Á(fish) thwina nai tong phuru a twino karwi kubun manwi bono mwthangwi man ya. Kaitorni hama bai langma rwui phola gwnang khe borokno snamjago, abo hai kheno bini a phola Kaitorno kangwi, sak lengpraui tong phuru swngcharni manwi khwnwi abono supungwi man ya. Borok Kaitorno se nango.

Borok rang-rí gwnang phano, bigra phano, siyan gwnang phano, siya phano, kebel phano thwimungno khe jotono kirijago abo bebak borokni thani nukjago. Kógono tongo- “Bebak swngcharno manwi bo phola se mwthangjak ya hwn khe tamono manma klai kha ba?” Thwimung borokni thani kaisa kwmamsingcha hai tei chaitogwi naibo aroni yógwi man ya. Aboni bagwi ahai hwnwi swngmung achai-o, “Borok thwimani ulo tamo wngnai?” O thwimung tei thwiwi ulni langmani kókno saui mannani bagwi kwbangma uansukmung bai khe chaitok kha. Abórokni bisingo bú uansukma khe sói? kwbangma chaitokmani bising twi obono chwngno saui man rw kha, bororok phola-o phiyókjaknani bagwi se lama naitugui tongo. Chini langma buphuru bahái wngwi thángxnai abono twiwi nwng uáisa phano kaham khe uansugwi da nai kha? srapsani ulo tamo wngwi thángxnai nwng saui da manno? Nini tabukni langma tei thinango nini phola mw de mwthangjakno abono saui man yani bagwi nwng thwinani swkang kisaswk nangkukmani kókno saui manthai tongo, hai ya de?

Borok sabo?

Borok Kaitorno kosol tei phola gwnang khe swnamjak. Borok Kaitorni simungni phan bai kaham bai hamyano siui mano. Aboni bagwi borok bini kók tei samungni bagwi kók ma sanai. Toksa-toktwi, mal-matarokni phola kwrwi tei kaham ham ya saui mannani phanbo kwrwi. Aboni bagwi kaham ham ya saui mannani a rwngmung borokni thani kwrwi. Bórok kerong-raidarok bai khajak ya eba kaham khe tong anw hwnwi khakajak ya. Aboni bagwi katswi toksa-toktwi tei mal-matarokni thani bandilaimarok phano se sumsok hwnwi khobjak ya. Teibo

nangkukmani kók khe, toksa-toktwi tei mal-matarok Kaitor bai tongkwtharni halok kw se kwrwi. Toksa-toktwi tei mal-matarok thwimani ulo hadwlwi-o kipphilwi thángo. Chwng bórokno lamarogo thwina naiwi tongmano nugwi tong phano na de naikol? In'hi, tei khaksa bwkhak nai khe, tumung borok khoroksa thwi khe chwng bono nai ya wng ya, katswi a bórok bigra eba lama-o rang sannai phano se wng thung chwng bono bórom rw lai-o tei khá kham lai-o.

Borok Kaitorno kangmani

Hayung gwnangwi chwng bororokno kisaswk tongthar eba ham ya phwrwngnairokno rwkthar laimani nugo, Jotono juda juda phrwngmung bai khe Kaitorno kangwi naituk lai-o. Thwimungno kirimani bagwi borok sakni sumsokni phiyókjaknani bagwi tei mwthangjaknani bagwi chaitogwi tongo. Mwthangjaknani tei yókmung mannani bagwi bórok podrepot khe chaitogwi tong lai-o, abórok wng kha— tongtharlam himwi, buino chubama bai khe, ratharwi barokma bai khe tei tongtharni raidarokno rákhogwi.

Tabuk swngmung khe chwng sakani o samungrokno khlaima bai sói sói da mwthangjaksugwi manno?

Borok – Achai phangsini tei samung bai sumsok gwnang

Swngcharo Khoroksa phano kaham kwrwi, Khoroksa bu ya. Kaitorno naituknai eba Bono saui mannai khoroksabo kwrwi. Chwrai phuru koklob swrwngma hai “Joni..joni, tamo apha... kwtwi de chá.. ? l'nhí apha..” (*“Johnny, Johnny... Yes Papa,... Eating Sugar? No papa .”*) Oro Joni-no kwtwi khoknani eba kók tatal sanani kebo phrwng ya. Joni kwtwi khokma simi ya,

abono cháui tatal kókbo sa kha. Borok sumsok khlaima bai sumsok gwnang hwnjak ya, tamo khe sumsok gwnangni bagwi se sumsok khlai-o. Tumung khoroksaswk sumsokni samung khlai tong khe bo sumsokni seleng wngwi thángo. Borokni bwkha se jotoni slái bandinai tei hamyakuk. Bwkha bisingni phainai ham ya uansukmung se borokno— borok buthar rw-o, sinal-chuta wng rw-o, uaija rw-o, khok rw-o, kók tatal sa rw-o, buini mungwi kók ham ya sa rw-o.... obo twirok se borokno ham ya khlai-o. Borok khoroksa mungsaswk khok khe dorbar nok bono sikok hwno. Phiya baithango khe, a borok sikok wngma bagwi se sikokni samung khlai-o.

Sumsok tei majrani poja

Sumsok borokno Kaitor bai hakchal khlai kha. Kaitor bai borokni kwcharo naislarmung tubu kha. A sumsokno borokno Kwthar tei kaham Kaitorni jolimani-o tubu kha. Kubui kók khe, borok khlaima bebak sumsokrok Kaitorno kebengwi sumsok khlaima se. Sumsokni poja'no jotoni slái poja kotor. Borok sumsokni majrani yóknani bagwi juda juda lama naitugwi tongo. Tamni hwnba sumsokni manthai thwimung se. Borok uaisa'-no thwinai aboni ulo buj thumjaknai. Borokni bwsak ha bai swnamjak, thwimani ulo a ha-o no kiphilwi thángnai tei phola khe Kaitorni aro buj thumjaknani bagwi kiphilwi thángnai.

Tongthar (Religion) borokno mwthangwi da man?

Borok samung khlaima bai, chubamung samung tei tongtharni raidarokno rákhokma bai bini sumsok pojani yókmung man anw tei mwthangjak anw hwnwi khá ka-o. Haiphano a samungrok borokno Kaitorni sói kaham buj thummani yakni phiyógwi man ya.

phunukmari; uansugwi na di, samung sitrani bagwi majra manjak borok khoroksa dorbar nogo buj thumnaini bws kango bachau sakno chwrai phuruni simi'no borok kaham, tatal kók sa ya eba buitali-buitala tongmung tong ya, kwbangma samung kaham khlai kha tei buino chubamung rw kha hwnwi sawui tong phano a buj thumnai a borokni samung ham ya khlaimani majrano láí thángxak jorani samung khlaimano nugui nakarwi da rwno? kaham khenó saimano, nakar ya.

Sumsokni khwi-o kwchajak khoroksa borok sak sakno a khwini phiyógwi man ya. Abo hai khenó tongthar, kerong, tongmung kaham phrwngmungrok, tei bwkha bacharwmung kókkrok borokno sumsokni khwini phiyógwi man ya. Borok **mwthangnaisa** khoroksa nango.

Kaitorni chubama

O swngcharo bebak borok'-no sumsok gwnang khenó achaió, tobo toro tei sumsok gwnang khenó thwi-o. Kebo phano bini nok arini borokno phano phiyógwi man ya. Kebo khoroksani langmano mwthangwi man ya eba khoroksa tei khoroksani sumsokni manthaino Kaitorni thani su-ui rwui man ya. Langmani bagwi su thai bo belai khe morok. Mungsa rw thai rwui phano borokno molbrúmni bagwi mwthang phlaina bagwi rwthaino khoroksa phano rwui man ya.

Phula khoroksa tei khoroksa phulano tolwi twi man ya. Abo hai khenó o swngcharni phrwngnairok, pírnairok, mung gwnang borok kotorrok achai phru'no sumsok gwnang khe achai-o tobo toro tei sumsok gwnang khe'-no thwimani bagwi a sumsok majrani kebo phiyógwi man ya.

Phiya Kaitor le hamjakmung gwnang, khairokma gwnang tei maya gwnang, bini uansukmung molbrúmno puilani simi sumsokni manthai molbrumni thwi phlaiya hórni mwthangwi tisa ya sakno tongo. Achukthayungo achukjak kaham tei buj thumnai Kaitor borokni saka-o bugra chá-ui tongnai a sumsokno jolimani bagwi bini kháno ham rwnani belai khe nang go.

Bebak borokni sumsokni majrano horwi mannai borok kaham kwthang Kaitorni mokolo khoroksabo kwrwi kha. Bebak borokno sumsokni rwthaino rwui phiyógwi mannai khoroksabo kwrwi kha. Aboni bagwi Kaitor bo sak baithang borok wngwi o swngcharo phainani nang kha, sumsok khelai yawui tong kha tei bebak borokni sumsokni majrano Bini saka-o ruju-ui na kha.

Kaitor

Kaitor sabo? Bini nukmarok bahái? Bini goron bahái? Chwng Bini swnamjak samung (lekha bai ya athukiri tei swngchar)-no nugui Bini kwthar tongmung, molbrúmni phan, chwngsacha, tei nukjak ya goronno saui mano. Kaitor se o swngcharno swnamnai. Aboni bagwi chwng saui mano swnamjakrokni bisingo swnamnaisa khe juda se. Bebak achukthayungni slái achukthayung kotoo achuknai tei o swngcharo suda bathak ya a Kaitor, Bo borokni yak bai swnamjak noktharo simi bahái khe tongnai? eba khe bo borokni yak bai swnamjakgw de manno? Kaitor ba phola ya de? Kaitor, bo langma gwnang ya de, nuknai, kók saui mannai tei bini bwsarokni surimano khnanai ya de? Borokni tongmung wng kha jolimani, tongmung sitra tongmani, kung chukmani tei risi gwnang wngmarok. Kaitoro tongmung hamya-o kwlwk yawui kaham, kwthar, kubui tei hamjakma bai kuplung wng yana da? Kaitor kwplai, phan

gnang, bebakno snamnai, bebago'no tongnai, molbrumno kwthang tongnai – Bo'-no puila bo'-no paithak – sakphang-sak tongwi tongnaisa.

Kubui kók khe, a khairokma gwnang Kaitor bini bwsarokno mwthangna bagwi mungsaswk khilaiwi tong kha. Chwng saui mano o swngcharo chini bahan-bwthwini Pha khoroksa tongma hai'no Phola-o bo chini Pha khoroksa tongo, bo wng kha chwngno swnamnaisa Kaitor.

Khristoni phiyókma samung

Borok kerong swbaimani, samung ham ya kh AIMANI tei sumsokni bagwi molbrúmni thwiphlai ya hóro khiklaijagwi tongmani. A sumsokni majrani rw thaino su-ui rwi phiyógwi mwthangwi mannai sumsok kwrwi borok khoroksa phano o swngcharo kwrwi kha. Aboni bagwi mwtairokni Kaitor bisi nwisai (2000) swkang Phola Kwtharni bising twi khe bwrwi sikla kwthar Mariamni ok twi o swngcharo achai phai kha. Bini mung'-no **Jisu Khristo**. O Jisu Khristo'-no bebak bororkni sumsokno swkakna bagwi kaisa chongjak jora-o thwina nang kha.

Jisu, sumsok kwrwi khe achai kha. Sumsok khilaiyawui'-no bisi thamchi tham khaksa (33 and half years) kwthang tong lang kha tei bini thani sumsok tongo hwnwi khoroksa phano hwnwi man li ya. Borok wngwi achainai a kwplaisa Subrai Kaitor, bo sakno majra kwrwi khe selengni samung kh lai lang kha. Kaitor phano sakno kusú swnamwi kók khnama bai thwinani gosi kha, kruso suda thwina gosi kha.

Jisu Khristoni bisingo Kaitor tongo. Bebak swnamjakrokni bisingo puila achaignanai, bo'-no a nukjak ya Kaitorni kaya. Bo Kaitorni chfngsacha bai kwchwng wngo, bo katswi Kaitorno

kosol; bo bini phan kwplai kók bai bebak swngcharno narwgwi tono. Chini sumsokrokno nakarna bagwi phan rwjak a Jisu Khristo'-no Kaitor. Bo chwng bai khulumjknani chúkjak. Bo bini langmano rwui teisa abono kiphilwi nanani phan tongo.

Kaham tei kotor yapharmung:

Thfi kochok rw yawui sumsok nakarjagwi man ya. Aboni bagwi swngchar gwnangwi dalbidal kwcham tongtharni bororok ratharmung ratharwi yaphar lai tong laimani. O bebak yapharmarok molbrúmni bagwi mwthangwi tisanai a yapharmung kotor phainani swkang swrapsani bagwi phunukma se – tamni hwn ba musuk tei punrokni thwi bai sumsokno suchau man ya. O musuk tei punrok yapharmani wng kha abo kalbari kruso Jisuni thwi kwthar sarchau bebak borokno phiyókna bagwi kaisa mari phunukma se. Jisu Khristo nono belai khe hamjak kha, hakhe nini sumsokno suchana bagwi nwng kruso thwinani nangma-o Bo Bini sakno rwui thwi kwthar khiklai kha tei nini sumsok, ham ya khlaimani, kerong swbaimani tei swraimung mannani tongmarok bini saka-o rujuui na kha. Jisu Khristoni thwi chwngno bebak sumsokni sucha kha tei kwthar swnam kha.

Krus saka-o yapharmung kotor yapharmani

Kubui kók khe, Jisu Khristo krus saka-o chini bemuk, ham ya, khá khammarokno rujuwui na kha. Bo chini dukhurokno rujuwui na kha. Chwng kerong swbaimani tei ham ya khlaimarokni bagwi bini bwsak kwsa charwjak kha, sukrupjak kha. Chwngno khákchangma rwnai a majrano bini saka-o berjak kha. Bini kwsa bai chwng ham rwjak kha. Chwng jotoni chayano Jisuni saka-o rwjak kha. Bo belai khe ham ya khlaijak kha, tekto rwjak kha

haiphano kók thaisabo salang li ya. Bo mera bwsa hai khe ratharna bagwi tlangjak kha tei siring siring khe ratharnairokni bwskango berai rwjak kha. Tekto tei majra berjakma bising twi chini sumsokni bagwi kruso butharnani tlangjak kha. Bo sakno sumsokni bagwi yapharwi rw kha.

Chini sak ham tei hamyarok hamnani bagwi Jisu kwsa charwjak kha. Chini hamkraini bagwi bo gwnang phano sakno bigra swnam kha. Mwthangjakmani ríno chwnagno chum rwnani bagwi bo krus saka-o rí kwrwi khe khachijak kha. Kaitorni mokolo chwnagno kaham khlaina bagwi sumsok gwnang wng kha. Chwnagno hamari rwna bagwi tei hamari gwnang khlaina bagwi bo swraimung gwnang wng kha.

Jisu, abo **Mwthangnaisa** hwnma se. Bo'-no uanamasingcha kók biti rwnaisa, phan gwnang Kaitor, molbrúm brumni Apha tei khákchangni bugarbo hwnjago. Chwng amjokjakma hai'-no, Bo bebak bwkhak twi amjokjak kha hai phano sumsok khlai liya. Aboni bagwi chwng amjokjak phuru tei chini bebak nangmungo bo chwnagno chubauí mano. Kaitor khlai man ya abo hai samung mungsa phano kwrwi. Bo bebaknono kaham khlai mano, haino hai swnamwibo man phiro. Jisuni mung bai soitan kháro. Bo nini bebak jorano kaham khe saui mano. Tumung nwng bono naituk khe tei poito khlai khe bo nono chubanai. Bo nakarwi man ya abo hai sumsok kwrwi. Bo nini ham ya samungno swkagwi mano, nini pojano rujuwui mano tei bwkha kwthar bai khe hamari rwi mano. Jisu ham rwui man ya abo hai ham ya kwrwi. Bebak swngcharno kók bai sanamnai Jisu'-no a Kaitor, bo nono kwmajak, baikhrupjak tei digisigi jorani phiyógwi tubu-ui mano.

Mangkhor Bukcha

Jisu Khristo chini bagwi krus saka-o thwiwi bini thwi kwtharno kochok rw kha. Bo phobjak kha tei sal thamni salo sumsok, thwimung, morke hakhorni, mwnakni phanrokni tei kwthwi borokni kosok mwnam tongmungno butharwi mechenwi bacha phi kha.

Kaitor, Khristono kwthwini mwthangwi tisa kha tei thwimungni tekto jwngjalno pái rwui rw kha, tamni hwn ba bo(Khristo) abono sakni phan bai romwi tonwi man ya. O hani borokni laibuma-o, Jisuni mangkhor simi se bukcha. Khristo mwthangwi tisajakma bai Phola Kwtharni bising twi bono'-no Kaitorni Sajla hwnwi sakhlai rwjak kha.

Tamo wngwi Jisu Khristo simi'-no chongjak?

- Jisu Khristo sumsok kwrwi khe achaimani tei kwthang tong lang kha.
- Jisuni thani chini sumsokno nakarnani phan tongo.
- Jisu, chwng bororok bai khulumnani chúkjak.
- Soitanrok suda Jisuno kwthar hwnwi sakhlai kha.
- Baibel-o kaithamra (300) ni slai kwbáng kók diyari swngcharno mwthangnaisa phainai hwnwi sa langmani abo Jisuni bising twi nwngh phai kha.
- Bororokno sumsokni phiyógwi mannai Jisu simi se (Kaitor tei Borok).

- Jisuni thani Kaitor wngna bagwi bebak nangmungrok tongo.
- Jisu sa-o, “Ang’-no lama, ang’-no kubui tei ang’-no langma; ani bising twi phai ya khe khoroksa phano aphaní aro phai man ya.”
- Laibuma-o Jisu simi se a nangkukma borok kotor. Bini kothoma abo chwrairokni haino uansugui swimani kothoma ya. Bini achaimani hayungo kaisa sini rwjaknai mari tei laibuma-o BC bai AD erano swkagwi rw kha.
- Hamjakma tei nakarmung bai kuplung bini phrwngmarok chirasai (millions) bororokni langmano swláí rw kha. Katswi sumsok khlainairok phano se bwkha kiphil kha. Nini kena arino hamjak di, nono satoknairokni bagwi suri san di, khoroksaswk nono yagra khangaro thapra rw khe yaksi khangarno chagwi rw phi di – obórok bini phrwngmarokni bisingo sajakjukmani kókrok.
- Jisuni mangkhor simi se bukcha. Thwimani ulo bo hai khe mangkhorni mwthangwi tisajaknai hwnwi bini a chwngsacha samung chwngno khatungma rw-o.

Khorksa phano kerong rákhokma bai Kaitorni mokolo kaham hwnwi romjak ya; tamni hwn ba kerongni bising twi se chwng sumsokno saui mano. Phiya ba Jisu Khristono poito khlaima bising twi se Kaitor borokno

kaham hwnwi romo, aboni bagwi oro kebo juda kwrwi. Bebak bororok'-no sumsok khlai kha hakhe chwngsajak Kaitor bai hakchal wng kha. Phiya ba, Kaitor ahai'-no khairokma bai bebak borokno phiyóknaisa Khristo Jisu twi Kaitor bai kaham hwnwi romjaknai.

Jotono'-no Lamsogo

Jisu sa-o :

- “Poja hilik twi wi lengjak bebak bororok ani thani phai di, ang norokno lengla rw anw.”
- “Twi kangnai borok bo ani thani phaiwi nung phai thung. Elembago hai hwnwi sajakma hai, ano poito khlainai borok bini bisingni twi kwthangni twisa boui phainai.”
- “Ani thani phainai borokno ang kiphil rwui rohor glak.”
- “O hani paithak jorani bebak bororok, ani thani kiphil di tei mwthangjak di. Tamni hwn ba ang simi se Kaitor, Ano karwi tei kubunni Kaitor kwrwi.”
- “Kaitor Bini sajlanu swngcharno majra bernai hwnwi rohor ya, tamo khe swngchar ba bo bai mwthangjak si thung hwnwi se rohoru.”
- “Ang norokno sói'-no kubui kók sa-o, ani kók khnau ano rohornaino poito khlainai borok bo mwthangjak phlai kha. Bo buj thumjak li ya, tamo khe bo thwimani lama bárwi thangnani lama-o sók phai kha.”

- “Bwrwima sakni abuktwi chánai chwraino pogwi da man ba? Bo sago twima bwsano khairok yaui tongnai da?”
- “Ta kiri di, ang nwnng bai tongo, bwkha ta bai di, tamni hwn ba ang nini Kaitor, ang nono phan rwnai, ang nono chubanoi, ang nono ani kwplai yak bai khe romwi tongnai.”

Kaitor bai kwrwngwi tongmani

Nini chuknohani Apha tei nono snamnais Kaitor bai nwnng halok kwrwngwi tongwi mano. Bo sakno kebo bai hakchal khe ton ya. Khristo Jisuno poito khlaima bai nini sumsok nakarjak kha tei Kaitorni sajla wngwi man kha. Kaitor nwnng bai khe tongna muchungjago, kók sana muchungjago. Bo nini kók khana muchungjago. Nini umor, nini dopha, nini poito, nini tongthar, rang-rí tei dopha jesa phano wng thung nwnng Kaitorni bwsa. Nwnng Bini khajani tei belai nangkukmani borok, tamni hwn ba bo nono bini thwi bai paiwi na kha. Bo Bini kwsa chajak yak pholgwi muchungma bai khe nono naisingwi tongo. Tumung nwnng yáskú súngwi suri san khe tei Baibel kwtharno khuk tang khe, nwnng Kaitor bai kwrwngwi Bono teibo siui mannai. Nwnng saichung tonga nang glak. Bo nwnng bai tongo. Nini bebek uanamarokno bini thani yaphar di. Bo nono naikolnai. Bo nono yakar glak, khibi glak.

Mwthangjakna bagwi ang tamo khlaithai:

Thwi phlai ya morkeni mwthangjaknani bagwi nwnng nini khá-o poito khlaithai tei sakno sumsok gwnang hwnwi gosi thai, búkhúk ham ya tikhlaimarok, samung ham ya khlaimarok tei uansukma hamyarokno bini thani nakar sanwi yapharwi rw thai.

- Morkeni phiyókjaknani bagwi mwthangnaisano nang súgo hwnwi nini khá-o saui manthai.
- Jisu se Subrai tei nono mwthangnaisa hwnwi khá bai khuk bai gosiui poito khlaithai.
- Nono sumsokni phiyókna bagwi Jisu Khristo krus saka-o bini thwi kwtharno kochok rw kha hwnwi bwkha-o poito khlai di. Hai hwnwibo poito khlai di; bo chini bagwi thwi kha, phobjak kha tei salthamni salo kwthwino mechenwi kwthang wngwi bacha kha.

Aboni bagwi Jisuni mungno poito khlaiwi bono yachaknai bororokno Kaitor bini bwsarok hwnnai.

Sep kahamno ta yakar di

Uáisa le joto borok'-no ma thwinai. Aboni ulo Khristoni chwngsacha achukthayungni bwskango buj thumjaknani bagwi ma bachanai. Khristo Jisuno bini sakni mwthangnaisa hwnwi gosinairok tei sumsokni nakarmung mannairokno molbrúmni bagwi Khristo bai baksa ma tongwinai.

Kaitor kaham wngma bai sumsokno majra ber yawui tong glak. Baibelo srai srai kheno sa-o, langmani bijabo bumung kwrwirok thwi phlai ya hórni lik-o khiklai rohorjaknai. A thwi phlai ya hóró sak soiwi tongnani belai kutuk wngnai. Aroni hórbo thwi phlai ya, yong bo thwi ya. Khristo chini sumsokno bini sago rujuwui na kha tei sumsokni manthaino rwui pái kha hwnwi gosi khe chwng a kirmasingcha buj thumjaknani yakni yóknai. Nwng sak-sak a manthaino tei su-ui rwna nangli ya. Nini sumsokni pojano Jisuni thani yapharwi rw di.

Nini langmano kwtal khe cheng phimani

Khajani kiching! O bijab (booklet) ni bising twi Kaitor nono kók saui tongo. O swngchar swnamjak ya sini swkang se bo nono hamjakmani bagwi chongwi na kha. Nono jora ham yani

phiyógwi tubuna bagwi Bo nini langma-o kwtal khe samung khlainani cheng kha. Bo nini muktwinno huwi rwnai. Ta kiri di, kwrak wng di. Kaitor se nini phaising tong khe sabo se nono kebengwi mannai? Bo nono tei nini núkhugno kati rwui tonnai. Nwng bono bwkha beraUi tong khe Bo nini nangmarokno rwnai tei nini muchungmarokno Bini chwngsachani bagwi supungwi rwnai.

Tabukno mwthangjaknani sal

Tabuk'-no nini bagwi jora kaham. Tini'-no mwthangjaknani sal. Khwna bahái wngno nwng si ya. Nwng-ang siyari hai se swrapsani bisingo nukjago swrapsani bisingo kwmaui thángo. Thinang bahái wngnai chwng si ya. O bijab (booklet) nini thani hai'-no ereng ereng phai sók phai ya. Jisu Khristo nono belai hamjago. Bo nono hamjakma bai khe bini ha-o hapna bagwi kobogwi tongo. Bini ringmano khna ya ta wng di. Bini hamjakmano yachak ya ta wng di.

Bo bini yak kwtharno nini phaising phologwi tongo. Nini bagwi Kruso thfi kochok rwui nono mwthangnai Jisu Khristo bo nini bebak nangmarokno kwlai keno jugaliui rwui mano. Jisu nini bebak jwngjal jora-o chubauí mano. Bo nono hamari rwui mano, ham ya ham rwui mano tei manwi kaham bai khá kochom rwui mano. Jisu nono mwthangna muchungjago. Bo nini bwkhani duglamo bachauí dugar bu-ui tongo. Nwng bono nini bwkha bisingo hap rwna muchung ya da? Bo bisingo habwi nwng bai thansa khe chámung chána muchungjago.

Note : Tumung nwng Jisuno teibo sininani muchungwi tong khe Google play store-o Bible App-no download khlai na di, khuk tang di, abo Phola Kwthar bai swijakmani. Baibelno juda juda kók baibo manthogo. Nwng o Baibelno khuk tangma bising twi Subrai Jisu Khristoni hamjakmano saui mannai.